



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 7



**Taoba Liverpool, Schalke defender
Joel Matip asaya nungi anener**



**NC lenir Omar Abdullah-i J&K LG ajurua
sorkar akümtsü asüngdang**

VOL. XXII ISSUE NO. 04 (ADOK 04) DIMAPUR AMUNGNÜ (SUNDAY) MONGPUTENI (OCTOBER) 13, 2024 ₹ 5.00

ENPO-i draft MoS atema mapang züngzüksür

Dimapur, October 12, 2024 (TYO): Eastern Nagaland People's Organisation (ENPO)-i October 11, 2024 nü Mon nung coordination & consultative senden ka ayonga menogo.

Senden nung October 31, 2024 matongdang state sorkari "Highlight of the draft MoS with ENPO on FNT" agüjang ta ashitsü bangiemtep.

ENPO-i August 23, 2024 nü Nagaland Chief Minister dangi shidi ka zülü aser iba sülen September 14, 2024 nunga Ministry of Home Affairs (MHA), Go-i meshiba ama state sorkar nungi telangzüba meshia shidi ka ajanga nenshia liasü.

Item shiditem zülüaka state sorkar nungi telangzüba kecha maliba ajanga tebilemtsü mekokteti lir.

Union Home Minister Amit Shah-i December 18, 2023 nü Nagaland state sorkar nem draft Memorandum of Settlement (MoS) ka reprangshitsü atema agüja liasü. Iba draft nung Eastern Naga nunger mapang talangka nungi aginüa aruba taginübatem dena lir saka state sorkari iba dak sendakba mapa meinyaker.

ENPO-i October 31, 2023 tashi züngzüksüba sülen Chief Minister dang iba onük asoshi temulung agütsütsü nenshiogo.

State sorkari anogo züngzüksüba tsüngda mapa meinyakra November 1, 2024 nü Central Executive Council (CEC) senden ka mena telemtebatem agitsü ta ENPO-isa metetdaksüogo.

ASTD aser DMST-i NSCN-Niki mapa kukua aitsür

Dimapur, Oct.12 (TYO) : October 10, 2024 anogo nung Diphupar nung Aor lanur tajung ana linük tenzüker tenüng ameri pua bener oa tamakangtsü akangba mapaji kukua aitsür aser yamala mapaji tanga aser tarutsü nunga memelatsü ta tanü sangdong ka ajanga Ao Senso Telongjem Dimapur (ASTD)-i metetdaksüogo.

"Anungji, ozüng bangdakpuri tekaraba nung aibelenertem aputsü aser tapet temerenshi agütsütsü akanger aser tai maketer temeten mangu tashi bushitsü aser nokdaksü," ta ASTD-isa metetdaksü.

Ano, kasa nisung pua bener aoba maparen nung, Dimapur Mongsenyimti Senso Telongjem-ia par senso tajung ana Living Water factory mapa inyaka lia NSCN(K) Niki teloki pua bener aoba mapa tamajungji kukua aitsür aser Ao

lanurtemi inyakba mapa nung tatem tashi nungitsü ta metetdaksüogo.

Dimapur Langpangkong senso Telongjem (DLST) züngsem ana pur aoba aitsür aser tensa tamajungba makümdang ozüng amertemi iba mapa inyaktertem dak tapet mapa inyaksü akhanger, ta DLST-i sangdong ka nung metetdaksüogo.

"Dimapur Ao Youth Organization (DAYO), Diphupar Naga Youth organization (DNYO), Ao Youth Forum Diphupar (AYFD) aser Foothill Ao Youth Organization (FAYO) temi ozüng alema inyaktertem anema noktakba nung DLST-ia pusema nungiter aser parnok nem tenüngsang agütsür" ta President C. Yabang Pongen aser Gen. Secretary Dr. Sendongyanger nati sangdong nung shia lir.

NSCN-IM & India sorkar tsüngda yimjung olemteper

Kohima, October 11, 2024 (Agencies): National Socialist Council of Nagaland - Isak-Muivah (NSCN-IM) aser India sorkar tsüngda October 14 nü maneni yimjung olemteper alitsü.

October 9 nü parnok mezüng ajurutepe senden amenba sülen ano October 14 nü ajuruteptsü.

General (Rtd) VS Atem-i anir züngsem 10 agi akümba NSCN-IM teshimtet telok ka New Delhi nung oa lir.

NSCN-IM-i wako aser temzüng balaka den Naga nunger ajak longjemtsü atema Pan Naga framework ka meshir.

NPGN/NNC (N/A) president

T Ovung-ia iba olemteper pusema nungitba metetdaksüogo. 2015 Framework Agreement nung ajemdaker lemtet agitsüla ta pai ashi.

V.S Atem-i aniba NSCN-IM telok aser Ministry of Home Affairs nung Adviser Northeast AK Mishra-i aniba Central telok tsüngda yimjung olemteper alir.

December 2023 nung Centre aser NSCN-IM tsüngda tatabangba ajurutepe olemtepeba sülen tang ajurutepe senden amener.

Yimjung olemteper maneni agiba ajanga Centre-i tatabangba kati arunüba sayur.

Dimapur lanurtem ka küma longjemer; Ghonda 48 züngzüksür

Dimapur, October 12, 2024 (TYO): October 10 nü NSCN-Nikki telungpurtemi Diphupar lanur ana apuba ken o atema Dimapur nung lanur balala senteper telok interim body ka tentetsü lemtetogo.

Iba ya Dimapur nung kin ajak longjemer lanur telok ka metetet tashi atema asütsü.

Honibarnü Hotel Saramati nung senden ka amendang Dimapur nung amenoka aliba kin balala nungi lanurtem adenba telok ka tentetsü lemtet.

Iba senden nungsa Ceasefire Monitoring Board dang lanur ana pur aoertem aputsüba maparen nung yaritepang ta shidi ka zülutsü lemtetogo. Iba atema parnoki CMG Chairman nem ghonda 48 züngzüksüogo.

Maneni, August 6 public rally nung lemtetba ama Nagaland nung lanur telok ka tentetsü pusema nungiter ta tanü senden nung adenertemisa lemtet.

Dimapur nung lanurtemisa tekaratiba nung public alidak nungi NPGs indang designated

camps agientsü takhangba agütsü. Parnokisa Naga Council Dimapur-i 'sorkar ka saru' lemtet pusema nungitba metetdaksü.

October 10 nü lanur ana pur aoertem pua arutsü atema bangdakpur nem ghonda 48 tsüngda züngzüksüogo aser iba mapang tsüngda mapa meinyaktetra lanurtem külemi lemtet agir inyaksangshia aotsü ta tekümdangtsü olen ka Dimapur nung lanurtemisa metetdaksüogo.

BRO-i yangluba Kohima-Pedi-Peren Road lapokogo

Dimapur, October 12, 2024 (TYO): Nagaland Governor La Ganesan-i October 12, 2024 nü BRTF Dimapur Camp semdang aser Kohima-Pedi-Peren road lapoktsüba sentong nung aden.

"Border Roads Organization (BRO)-i Nagaland dena linük kübok tesem balala nung mapatong 75 renemer lapokba sentong nung shilem agiba atema pelar" ta Governor Ganesan-i ashi.

Item mapa ajanga asen linük defence tashi itdaksüba aser connectivity tajungba kümdaksütsü tenangzükba kuli

sayur, ta pai ashi.

Union Defence Minister Rajnath Singh-i iba mapa ketdangsüa aniba aser BRTF-i Nagaland nung Kohima-Pedi-Peren Road takok ngua yanglutsüba atema pelar ta Ganesan-isa ashi.

"Kohima-Pedi-Peren Road ya kanga tongtipang lir aser iba ajanga rongsenketzüng renloktsü. Item apu aser lenmangtem ajanga defence maparen nung yariba dang masü saka rongsenketzüng renloktsü aser connectivity tajungba

akümtsü" ta paisa ashi.

Dimapur nung Border Roads Task Force nung Casual Paid Labourers tanurtemi takok tulu anguba atema Governor-isa tenüngsang agütsü.

"Lanurtemi takok anguba atema asenok benjungtepeba dang masü saka parnok tsüraburtemi anogoshia meranga inyakba, bendanga agütsüba asoshi pelateper" ta paisa ashi.

Border Roads Task Force-i parnok mapa inyaktertem asoshi bilema inyakba atema tenüngsang agütsür, ta Governor-isa shisem.

India-i mitkar tashi amshitsü nungnanga mali: Rajnath Singh



Defence Minister Rajnath Singh-i Vijaya Dashami anogo nung 'Shastra Puja' inyakba angur.

New Delhi, October 12, 2024 (Agencies): Nüngdak süra India-i prangpong-injang amshitsü ta Shastra Pooja ajanga jangjajangja sayur ta Defence minister Rajnath Singh-i ashi.

"India-i tesempa mesüra mezüngmeshia linük ka danga amakba mali, saka linük asoshi lendong benstür arutsüsa tensa ajurura onoki mera tulu agitsü aser mitkar tashi amshitsü" ta Rajnath-i ashi.

"Onok mezüngmeshidang mesüra lendong bentsür arutsüsa tensa ajurudang, tamangba yimsü, ochi aser meimchir temeten anema inyakdang onoki rarar. Iba senmangji onoki amanga lir aser iba senmang wazüka ayutsü. Ajsüaka onok

asoshi lendong asütsüsa inyakra onoki mera tulu agitsü nungnanga mali. Shastra Pooja ajanga iba ya sayur" ta West Bengal kübok Sukna nung Rajnath-i ashi.

Defence minister Rajnath-i sepaitem den Dussehra külemi among aser Sukna military station nung Shastra Pooja among.

"Indian Army-i iba benjung amongba ya prangpong-injangtem ajanga linük kümzüka ayur ta sayuba lir" ta pai ashi.

Rajnath-i Shastra Pooja nung modern infantry, artillery aser communication systems dena military equipment aser mobility platforms den drone systems atema sarasadema liasü.

Iba sentong nung Army Chief General Upendra Dwivedi, defence secretary-designate RK Singh, Eastern Army commander Lieutenant General Ram Chander Tiwari, BRO chief Lieutenant General Raghu Srinivasan aser Trishakti Corps Lieutenant General Zubin A Minwalla nunger aden.

Rajnath-isa BRO (Border Roads Organisation) infrastructure projects 75 tashi lapoktsü.

Ladakh, Jammu & Kashmir, Himachal Pradesh, Uttarakhand, Sikkim aser Arunachal Pradesh dena tanga state aser union territories 11 nung Rs 2,236 crore endoka BRO-i item mapatong inyakogo.

Longjang Kaketshir Telongjem Mokokchung kum 75 jubilee mongogo



Longjang Kaketshir Telongjem Mokokchung kum 75 jubilee amongba sentong nung Longjang Kaketshir Telongjem Mokokchung pur-i temeja ken atandang tangokba aser tetushi tejaoker Advisor Wb.T.N.Mannen IAS(Retd) aser Professor Dr.I.Lanu Aier noksa nung angur.

Mokokchung, October/Mongputeni 12(TYO):

Longjang Kaketshir Telongjem Mokokchung kum 75 ajungba WasümingSsentong October 11 nü Mokokchung town hall nung "Jangyumedem Shisashir" omen nung ajemdaker kanga dang mera ketketa mongogo.

Iba jubilee sentong nung tetushi tejaoker Hon'ble Advisor Law & Justice, Land Revenue Wb.T.N.Mannen IAS(Retd)-i jembidanglima nung alidang telinütsü mapangbaji lanur asüba mapang lir, lanurta kodang südir ibaji kaketshirtem lir, kaketshir asüba mapangji mapang timi amshiteta takum azüoka alitsü kanga dang nungtaker, anungji lanurtemi pei dak aketba sempetji angateta pei sempet timi amshiteta pei takum nung takok angutsü merangsülata adenshia aliba kaketshirtem ajungshia ashi.

Tetushi tejaoker-isa tzu khen yima alubaji tanaben ano meyipa yima marur, anungji maongka tajung arudang iba maongkaji agiteta nükjidong ayuba atongtsü merangsülata kaketshirtem ayongzükba den külemi Longjang nunger rongnung pa mezüngbuba IAS officer kümdaktsüba asoshi Tsüngrem tenung asanger aser pai pa sarasademji Longjang nunger ano maneni IAS aika adokdakjangta temoatsü meshia

sarasadamba lemsatsep.

Nagaland nung Graduate aser Post-Graduate asür ajak agi 79000 tashi lir, sorkar mapa angutsü asoshi tebilemtsü tulu adokogo, anungji kaketshirtemi Tsüngremi agütsüba sempet-ji amshia pei azüngba nung takok ngur kelen nükjidong ataloker alima asoshi kechi tajung inyaksü ibaji bilema alitsülata kaketshirtem ajungshia jemb.

Sentong nungsa Professor(Retd) NEHU Dr.I.Lanu Aier-i jubilee omen " J a n g y u m e d e m Shisashir" nungajemdaker jembidang azüngba ajanga tangatetba angur, tangatetba aliba ajanga shisatsü angur, anungji kaketshirtemi tangatetba nguteta takum nung shisatsü angtsü asoshi nentaka azüngtsü, nisung shiba dak tangatetba aser shisatsü maka pa takumji mangmanga dang alitsü, anungji takum sangwa sangwaa taso shia alitsü asoshi kaketshir kati nentaka meranga azüngtsülata ayongzükba jemb.

Jangyumedem Shisashir ka sütettsü asoshi shisashir kaji tekümdang aser tenendak asütsüla, kechiaser nükjidong atongtsü asoshi aser tangar dang temaba asütsü asoshi kaketshirtemi pei azüngba nung temelung bendanga agütsütsülata sentong nung dena alir kaketshirtem ayongzükba jemb.

Tanu putu technology ajanga kechisarena nung liro medema aotsü kanga dang tasak kumogo, anungji lanurtem meranga azüngtsü aser shisatsü angutsübaji kangasa nungtaker, takok ngutettsü aser nükjidong tongtettsü asoshi tang putu nung tazüngertemi akhidang nungi noklangben merangtsüla mapang agi tongja tongogota tongti o jembir-isa ashi.

Sentong nung LSTM Home Evangelist Wb.A.Wati jamir-I sarasadema tenzük aser tarur pela agizükba jemb LKTM Tir Sb. Atipong Aier-i, LKT Tir Sb. Moarenba Lkr, AKTM Tir Sb. K a j e n k a b a Aier, Chairman, Longjang Village Council Wb.S.Imti Aier aser LSTM Tir Wb.T.Sashi Imchen nungeri jemb Menungra bilemteter ta sür Advocate Wb.Repjentsüng Jamir-i agi, Ralarashir ta sür SDO, Electrical, Mkg. Er.Achanger T.Aier-i agi, Kaketshirtem atema mejetta Pastor ABA Rev.Ngangnen-i sarasademtsü, iba den Jubilee ken ka LKTM pur-i aten aser Longjanglar Telongjem Mokokchung teloki ken tajung tena sentong meraketdaks aser tatem nung teloki külemi sarasadema tembangba den Kr.Temjenjungla Longchar lenisüba nung iba sentong agia liasü.

MTLT-i nisung pur aoba aser rakzükkrakdemba aitsür

Mokokchung, Mongputeni/October 12 (TYO): October 10 nü Chumukedima nung amendaker aliba 'Living Water' package drinking water business handymen ana pur aoba aser Naga nunger telungpur telok kati kasa shishilemar dang nungi senotsü akhangba Mokokchung Town Lanur Telongjem-i aitsüogo.

Diphupar aser Chumukedima nung amendaker aliba lokti tentet balala shirnoki iba inyakyim anema ola adokogo parnok den MTLT-a nokdaka lir aser lokti libaren anema inyaksangshiba aitsür, ta MTLT tir Imnaonen Pongen aser General Secretary Moarenba Ozüküm nati külem sangdong ka ajanga metetdaksü.

MTLT-isa, telungpurtemi

pur aoba nisung ana ya Ao'er lir aser iba amala inyakyim ya kodanga magizüksü, ta metetdaksüogo.

Kasa mapang nung MTLT-i, Dimapur/Chumukedima ya Nagaland indang commercial hub ka aser state atema kanga tongtibang ta agizükba lemsatpogo. India sorkar den Naga nunger yimden yimsüsüba ken o mebeneteli liaka tang tashi nung iba tesem nung Naga nungertem tesunep nung lia arudar.

Naga nunger lanurtem ali rongsen aazüktsü atema lenmang balala bushia inyakyim balala nung sotaker inyaksangshiyonga aoba mapang ka nung iba amala inyakyim ajanga lokti yimjung aser tesunep nung aliba dak kongshir aser tetsükdaksü

adokdaksür. Iba ama nisung pur aoba aser senotsü takhangba agütsüba ajanga Naga nunger liba liro nung kongshir, ta kasa sangdong ajanga metetdaksü.

Anungji Mokokchung Town Lanur Telongjem-i, ken o dak sendaka aliba ketdangsurtem aser talisa law enforcing agencies tem dang iba amala lendong ya mataloktsü atema kükümü alitsü mepeshiba metetdaksüogo.

MTLT-isa, police tem dang ken o takaratiba nung benteta, aibelena alirtem aputsü takhangba agütsüogo.

Maneni MTLT-i, Naga nunger lanurtem taküm, rongsen aser kiojen wazüka ayutsü asoshi teyari agütsütsü renema aliba kasa sangdong ajanga metetdaksüogo.

Chuchuyimpangnung Aoli Longpok semchir Lemtur mungdang takok manung kaogo

Mokokchung, 12th Oct (TYO): 15 buba Aoli Longpok Semchir Lemtur mungdang October 10 & 11 anogo ananü "merasen nükmen" omen dak rangloker Chuchuyimpang yim dak ayongzükba mungogo.

Iba sentong nung tetushi tejaoker, Joint Director, ATI, Kohima, Dr. Rongsennungbai shisadangtsü o tarok aika bener arua lemsatsep. Tangatetba, temetetba aser teratetba sabiji Tsüngrem ket nung dang lir, anungji, Tsüngrem dang azüngashira pai lanuasensor moatsütsü, ta ashi. Ochi ya kecha agia alitsü makok, tanü asen lima aser lokti nung ochi laoa lir, anungji, kechisarena nung teraksa anemer, ochi inyaker aser yimjung yanglur kidong ka asütsü paisa tayongzükba agütsü.

Onük jembir Clark Theological College nung Academic Dean, Rev. Dr. A. Tali Ao-i "merasen nükmen" nung jembidang, merasen nung Aor Aotsür yimdenyimli aser

arogo nung lirumedema shilem agitsü, alima tzu-mopung wazüka aser kumzükba ayutsü, Ao oshi angazükba den jembitsü aser zülutsü, alu meranga ayimtsü, tensa den apet Aoli Lemtur official website/YouTube lapokba den azümesen meli-i kin kidong aser Naga nunger ajak den ochi aser temeim nung sobaliba-a aotsü, aser kechi sempet asenok nem moaja lir ibaji mesamai nükmen aibelen mesüi aotsü tayongzükba agütsü.

Sentong nung L. Bendang Lemtur IPS (Retd), Chungliyimti Village Council Chairman, Chubatemsu, Longpok Semchir Inti Mungdang tir, K. Nokmarenba, Pongen Mungdang tir, Bendangwati, Lanutemshi Lemtur Dobashi aser tangartemia shilem balala agia liasü. Chuchuyimpang Ilangtsür, Mokokchung Town Lemtur Lanur aser Limawati Lemtur parnoki mungdangsanger saksalemdakja ken aten.

Longkhum Tourism Policy saya



Longkhum Tourism Policy Longkhum Village Council Chairman Wb.C.Angang Jamir-i (abelen) sayatsür aser Longkhum Tourism Policy renemba Convenor Wb.L.Alemtemsü Ao(achichi) noksa nung angur.

Mokokchung, October/Mongputeni 12 (TYO):

Mokokchung district kübok aliba Longkhum yimtak tanu Longkhum yimtsüngji tangar puatsüsa tali tajungba nung renema alitsü asoshi asayameyangba "Longkhum Tourism Policy" ta sür renemba sentong kakat ka tanu Longkhum yimtak Longkhum Village Council Chairman Wb.C.Angang Jamir-i sayatsüogo.

Longkhum Tourism Policy renemba sentong kakat nung

Convenor Wb.L.Alemtemsü Ao ajanga ashiba agi alima nung tourism ajungkettsü aser Longkhum nungeri Tsüngremi maotsüba chichiba alima tobur junga wazüka ayutsü aser ano nüburtem tip tesüngsüa litetba alima ka kümdaktsütsü aser alima balala nungi arurtemi North East India, Nagaland aser Mokokchung-ji alima otsü nung tetshidaktsütsü asoshi inyaksü nüngtem sür iba mapatongya inyak tenzükerta metetdaksüogo.



6 buba Noble Deeds Day anogo nung Chuchuyimlang Kaketshir Telongjem(CKT)-i ayonga Late Natwar Thakkar mapa tajung bilemteta yimti nung merakmoju mapa balala inyaka liasü. Iba anogoya 9th October nung Natwar Thakkar, Nagaland Gandhi Ashram tenzüksang takum aliba mapang Naga lima nübur social work maparen balala ajanga yariba angazükba aser bilemteta tanü lokti aser nisung shia kati-ka yaritepba alitsü nükjidong nung iba sendong ayonga amongba noksa nung angur.

Tamil Nadu nung train ana tsüktepba lendong nung nisung 19 yiru



Chennai, October 12, 2024: Hokolbarnü Chennai anasa Kavaraipettai nung Mysuru-Darbhanga Bagmati Express train aser khu abenba train ka na tsüktepba sülen Honibarnü gol amshia train agienba noksa nung angur.

Tiruvallur, October 12 (Agencies): Hokolbar aonung Chennai anasa Kavaraipettai Railway Station nung Mysuru-Darbhanga Express train aser khu abenba train ka na tsüktepba lendong nung nisung 19 yiruogo.

Aonung 8:30 ako meta Chennai-Gudur section nung Ponneri aser Kavaraipettai tsüngda atalokba lendong nungji passenger train coach 12 shi train lenmang nungi tetsüng longteta tugu.

Railway kettangsertemi ashiba agi, express train ji ghonda ka nung kilometer 75 kera aoba mapang nung train

jagi tongti lenmang toktsür tezü lenmang kati aoba ajanga khu abenba train denji tsüktep. Ibaji ajanga khu abenba train nung aliba parcel van ka nung mi adok.

Iba osang angashia Southern Railway aser local kettangsertem iba tesem jagi aoba sülen kümzükba maparen inyaka liasü.

Iba lendong nung nisung 14 kanga mejungi yirua Stanley Hospital-i anir ao. Kasa lendong nung nisung pongu-a tera yiru, ta kettangsertemi metetdaksü.

Railway Board-i sangdong ka ajanga, "Loco pilot, staff aser guard lendong nungi

kümzükogo. Tang tashi nungbo nisung asüba osang mali saka karbo yiruogo. Iba lendong nung yirurtem ajak anasa aliba hospital balalai anir oa yaridar," ta metetdaksü.

Hokolbar aonung Tamil Nadu nung atalokba train lendong ya yaküm Balasore nung atalokba train lendong den mesükteper. Yaküm Balasore nung Coromandel Express train-a tongti lenmang toktsür tezülen aliba lenmangi aoba ajanga khu abenba train ka den tsüktepba sülen maneni Bengaluru-Howrah Superfast train den-a tsüktepa liasü. Iba lendong nungjibo passenger 300 shi asü.

October 17 nü Haryana nung Nayab Singh-i CM tenangzükba agitsü

New Delhi, October 12 (Agencies): October 17 nü Haryana kübok Panchkula nung BJP sorkar tasenba tenangzükba agitsü aser iba sentong nung Ato kilonser Narendra Modi den BJP lenirtem aser state balala nungi chief minister tem adentsü, ta BJP-i metetdaksü.

"October 17 nü Panchkula nung Chief Minister aser council of minister temi tenangzükba agitsü atema Ato kilonseri melungogo," ta taoba mapang Haryana Chief Minister Manohar Lal Khattar-i metetdaksü.

Osangbenertem den jembidang Panchkula deputy commissioner (DC), Dr Yash Garg-i, "Iba sentong atema onoki renemdar," ta metetdaksü.

March ita nung Nayab Singh Saini-i chief minister Manohar Lal Khattar melenzüka liasü. Nayab ya other backward classes (OBC) nungi lir. October 17 nü pai CM tenangzükba agitsü.

Osang angazükba agi, parliamentary constituency aser kin sasep nung minister tem shimtsü, aser ibaji party nung bangdak lenirtemi telemtetba agitsü.

Sorkar yimsüsüba menden liromedemtsü atema talisa Jat, Khatri, Brahmin, OBC aser SC nungi minister tem shimtsü, ta kasa osang ajanga metetdaksü.

Tang tasenpurtem densema MLA temi minister menden atema BJP National Tir J P Nadda, Union home minister Amit Shah, taoba mapang Haryana CM Manohar Lal

Khattar, Haryana election nung party in-charge, Union minister Dharmendra Pradhan aser MP Biplab Das nunger den tongtepratepa jembidar.

Hokolbarnü BJP Haryana core group nung züngsemtem-Pradhan, Deb aser Khattar nungeri cabinet tasenba atema o lemtepogo.

Haryana nung chief minister densema cabinet nung minister 14 tashi alitsü akok.

Tawa Haryana assembly elections nung BJP-i menden 48 nung takok ngua liasü. Congress-i menden 37 nung takok angu aser Indian National Lok Dal-i menden ana nung takok angu.

Jannayak Janata Party aser Aam Aadmi Party natibo menden ka nunga takok mangu.

NC lenir Omar Abdullah-i J&K LG ajurua sorkar akümtsü asüngdang

Srinagar, October 12 (Agencies): Jammu & Kashmir nung Chief Minister menden atema shima alisang aser National Conference (NC) tatong Tir, Omar Abdullah-i yasüng Jammu and Kashmir LG, Manoj Sinha ajurua sorkar akümtsü atema asüngdangogo.

Omar-isa sorkar akümtsü atema Congress-i NC pusemba shidi LG nem agütsü.

Tawa Jammu & Kashmir assembly election nung National Conference aser Congress na lokteper toktep aser takok ngua liasü.

Taoba mapang Jammu & Kashmir chief minister, Omar-i, LG aser Centre tsütsü naprongla nungi inyakyim ajak Mongolbar tashi nung renemtet nungbo Bodhbarnü (October 16) sorkar tenangzükba sentong agitsü, ta metetdaksü.

Brihostibarnü National Conference-i Omar legislature party lenir shima liasü. Election osang sangdongba sülen Omar tebu aser NC Tir, Farooq Abdullah-i, J&K Union Territory

nung par jabaso, Omar chief minister asütsü, ta sangdonga liasü.

Osangbener den jembidang Omar-i, pai LG dang sorkar tenangzükba agiba sentong agitsü asoshi anogo shimang ta shiogo, aser taruba anogo ana-asep tsüngda pa dang nungi telangzüba angutsüa akok, ta metetdaksü.

"Ni LG ajuruogo aser Congress, CPM, AAP aser independent MLA temi onok pusemba shidi pa nem agütsüogo. Sorkar mapa tenzüksü atema tenangzükba agiba sentong agitsü anogo shimang ta pa dang mepishiogo. Inyakyimji talang asütsü kechiyong yangi (J&K) Centre temzüng lir. Mezüngbuba nung LG-i shiditemji Rashtrapati Bhawan dangi yoktsü, iba sülen Home Ministry ket atongtsü. Iba atema anogo ana-asep agitsü, ta onok dang shiogo. Anungji Mongolbar tashi nung inyakyim ajakji renemra Bodhbarnübo tenangzükba agiba sentong agitsü," ta pai metetdaksü.



Global Hunger Index 2024 nung India jenjang 105buba nung lir

New Delhi, Mongputeni/October 12 (Agencies): Honibarnü 2024 Global Hunger Index report sangdongogo aser iba Index nung linük 127 nungi India jenjang 105 buba nung lir.

Iba index nung linük 42 bo "serious category" nung lir aser item linüktem rongnung India, Pakistan aser Afghanistan linüktem densema lir.

"2024 Global Hunger Index nung India score ji 27.3 lir, anungji India nung ayaba tebilemstü ya kanga süoki ia agitsüsa lir," ta kasa report ajanga metetdaksü.

Yaküm-a India-i Global Hunger Index report aija liasü.

India nung arrshi küm 5 ser tekübok tanurtem shilem 35.5 bo tar tatsü aser arrshi küm 5 ser tekübok tanurtem shilem 18.7 bo temang touzük kanga ajema lir. Iba dak alia India nunger nütsüng shilem 13.7 bo

chiyungtsü agi matu, ta report nung shia lir.

Iba Index nung South Asia nung aliba linüktem Bangladesh, Nepal aser Sri Lanka linüktem India dang nungibo tajungba, kechiyong item linükjibo "moderate category" nung lir.

Yaküm iba Index nung linük 125 nungi India jenjang 111 buba nung liasü saka taküm jenjang ano tamajungba kümogo.

GDP (Gross Domestic Product) teimba akümba ajanga ayaba level tajungba makümer, ta shia kasa report ajanga, coronavirus wara agi kongshiba mezüng küm India nunger GDP ainba kanga ajema aküm, ta metetdaksü.

2017-2019 nungi 2020-2022 tashi India nung chiyungtsü agi matuba jenjang tamajungba aküm, ajisüaka iba mapang nungjagi tenzükba jenjang tera tajungba kümogo.



October 12, 2024 nü Nagpur yimti nung Rashtriya Swayamsevak Sangh (RSS) züngsemtem 'Vijaydashami' sentong nung tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, OCTOBER (MONGPUTENI) 13, 2024

Tsüngrem tsübuwa atentenba

Asenok aikati tsübuwa aitdang atentenba mapang ajangshir alitsü. Iba ama tetsübu agi atentenba mapangji taküm nung tejenokdak aser teimla mali akümba mapang lir. Ajisüaka, taküm nung tetsübu tatenten tensa tia ajuruba kabo teimla samadak masü saka teimla tenzükdak lir, ibaji asangsang nung Tsüngrem ajuruba mapang asütsü. Ashiko, iba tetsübu mapangjibo asenok aikati majurushii alitsü akok. Ajisüaka, Isaia 66: 2 nung ashir, " shibai kü o nung atentena ali, pa dang ni reprangtsü." Iba Lai tapu nung Tsüngremi asenok dang kotakji pa menden aser alimaji pa tsüng ajemetdak, tetezü anüng aser alima naji Pa ki lir aser yangji aliba ajak Pa meyong, anungji asenoki Pa asoshi ki ka yanglutsütsüji menüngdak aser tamakoktsü lir. Anungji, asenok mapaji Tsüngrem asoshi tenla ki, guest house, staff quarter ama kiojen yanglutsütsübaji masü saka Pa o nung atentena amangtsübbaji dang Tsüngremi aginer. Item purtemji dang Tsüngremi reprangtsü aser shisatsü agütsütsü ta Laishiba ashir. Ajisüaka, asenok asoshi tebilemtsü kaji, asenokia asen taküm nung Tsüngrem tsübuwa agi atententsüsa Tsüngrem ajurudanga lir mali (?) ta asüba tasüngdanga ya asütsü. Kasaji, asenokia Tsüngrem o bushidang Tsüngrem ain aser tashi angatetba agi tsübuwa atentena aitba mapanga ajurudanger na ? Kodang tenyar Yohan den Tsüngremi jembu aser pai Pa angu, (tetsübu tatenten nung) pa Pa tsüngdang laodok ta Jungkai adok 1:17 nung shia angur. Pa dang masü, Saul-ia kodang Yisu ajuru paa (kor rongdong nungi tsüka-a) laodokba Tenyar mapa 9:4 nung shia angur. Aji oda, Mosa dena kodang Tsüngremi jembu, paa atentena adok aser pai pa tejak miim ta Anitet 3 aser Tenyar mapa 7:32 nung shia angur. Atangji, Tsüngrem ajuruba mapang Pa tashi aser nükra metizüktet atentena laoba nisungtem aika lir aser ano, item rongnung Yisu nütsüng Simon Peter-a ka asütsü. Kodang Simon Peteri Yisu dak aketba ain aser tashi asangsang nung angu, paa tsübuwa adok aser pai Yisu tsüngdang temokok agi apudak. Idangji, Simon Peteribo, " kü madang nungi oang, oh Kibuba, kechiaser ni temenen nisung," ta ashiba angur. Iba amaji, tanü asenok tamangertemi asenoki amangba Tsüngrem den masayai Pa tashi aser tsüngken tsübuwa atentena amangtsübbaji kanga tongtibang kumogo. Tamang nung tatsük süra tatsük, temekong süra temekong liang ta ashi ama, asenok tamangertem ya amangli amangerbo Tsüngremi balaka ajioktsüsa aser reprangtsüsa asenoki Pa o nung atentena amangtsüla. Asenoki junga mangateter dang ashi, Laishibaibo asenok dang Tsüngrem tsübbaji shisatsü tetenzükdak ta ashir. Tetezü, kotak aser ali aser yangji aliba kechisarina ajak yanglusang Kibuba tsübuwa amangertem nem tajung ajak angutsüsa shisatsü agütsütsü. Ashiko, asenokibo shisatsü angutsü atema Doctorate tashi azünger asütsüsa akok mesüra Reverend naroküm angu nung dang shisa taka akümer ta bilemtsüsa akok, saka ibaji Laishiba tesayuba masü. Laishibaibo asenok shisa kanüra aser Tsüngrem nem asen nungdak reprangdaksünüra, Pa o nung atentenang aser Pa tsübuang ta dang shia lir. Atangji, asenoki Laishiba azünger aser Pa dak amanger saka Pa metsübur, anungji kecha atentena mebilemer. Ibaji asenoki Ethiopia nungba ama asenoki Laishiba mangatetba ajanga lir. Laishiba mangateta tetezü Tsüngrem tashi aser toachi mangateter. Iba jaji Tsüngrem dakbo amanger amai saka auyar, nüktapangtar aser asenoki asenoksasa mazüokteter. Yisu o aser ain agi tasür shia arudaktsü, temenen tanela aridoktsü aser tzuim yipru anendaktsü ta asenoki amangra, atangji asen Tsüngremji Tetsübutsüka aser Tesüngmangtsüka saka Taochi aser Temeim agi sünga aliba Tsüngrem lir ta asenoki tali jangjaa metettsü. Iba ama Tsüngrem o aser tashi nung tsübuwa atentenbaji asenokia ajangshitsüsa sarasadema Tsüngrem o bushitsü kanga nungdaka kumogo.

OLEMSABANG

TEKÜMTET TAKÜM

- T.Lima Jamir, Artang Ward

Khrista nung temeim amangbapur tajungtem tamasa küm 70 tama nung aliba teintet tajungtem asenok joko tanur-a masü lanur-a masü joko leper kiküm nung alirtem tang asünung tanur ama mebilemi aser lanur mapang ama mebilemi akidang asenok tanur aser lanur mapang asen tsüraburtemi kechi koma sayubentsü agüja sentepi teti aotsü aser sentep kidang asaprang masüi pastori kechi ashir ajaki angangma ta ashiba tu pei temulungjang nung teti bilema aser mamadoki alitsüla. Revival mapang aser ainer arudang teti sentep indang atema shia aruba tu ajak mamadoker pei chir dang aser semchirtem dang sayubentsü tajung agütsütsüba masü no? asenok joko alishi tatemer aser leper kiküm nung nokdaka alinung asen iba akümüli wadang medembang dang pei chirnur aser semchirseemnur dang Tsüngrem o nungi sayubentsü tajung agüja parnok tajung kümdaktsütsü aser koda sür Tsüngrem akümstübuwa alitsüla, tekümtet tajung ngur Tsüngrem meteta intetdaksütsü merangtsüla. Ojala aser Obala nungertembo senti adangi atudang menen khu bener matutsüsa ochishia Tsüngrem akümstübuwa alia ser parnokbo kotak nung alitsü südi. Alimapurtemia senti adangji pei inyaksaba menen khu bener senti adangi metunübayong ochishia ali ta angazüker. Anungji temeim arishir tajungtem asenok tanur asüadang nungi lanur tashi asen tsüraburtemi kechi metsü tajung proka yutsür iba akümüli wadang toktsür ogo, par tsüngsü nung asenokia lidi arungma. Khrista nung temeim aier asangurtem tajungtem aser kiyim lanur tajungtem otsüla aser oboula nungger iba lima toktsür maodangsa parnoki ashiba o senzuka teyutsüma. Na-a tanü amai tangbo malitsü, anungji asenoki amanga aser külema aruba Tsüngrem ya Akbraham, Isak, Yakop Tsüngrem aser taküm Tsüngrem asünung asenok koloni aor aser kolen nungi arur aser asenok ajaki senti adang ajangteta tur külenang adakji tasü taküm metetsü aser idangji Tsüngremi obendangtsü asünung Tsüngrem akümstübuwa alitsü merangangma.

NOKYU MAJUNG METJI

- P.Renthy Jamir.

(*Taoba adok nungi...*)

Anungji ABAM kübok melangmepu mangatettep tulu ka ali ama küm paika amangba pur tsüngda temulung yirutepa joko Yisu dak rangloker kotaker senmang raktepa kotak yimli ajangzüktsü melena Bethlehem nung rangloker amokmerentepa aliba kotak yimli ajangzüktsü melena Bethlehem nung rangloker amokmerentepa aliba yagi Nokyu majung metjia tama ataloktsü paika atalokyonga aor ta bilemer .Anungji tamanger ajaki asen teyanglur Tsüngrem shiba tsüngdang tamakoktsü kecha mali, pa dang koba mangtettep ken O joko asenok tsüngdabo azüzüktepa tsürem orem akatsü tamakoktsüba ka court nung lir , iba ya tekaratiba nung nübur ajak mulung asütsüsa ochiba tatem O bendang agüjang ta lumia sarasademtsüla. Aji oda mesütet nungbo aser asenok sarasadem Tsüngremi angashia melangzü nungbo shisema aruba ama iba case yabo joko tang taküm anünga alir akümlirtemibo mokoktetsübasana anungji monüyonga kanga memunudangsa Asüyimi Solomon khen tajai aotsüsa akümstü ta bilemer .

O tembang ni aiben ABAM indang yamala ocet zülur anungji karibo ABAM anemer ama bilemtsü . Saka tamalen shisemba ama aseni saru agütsüba telokjisa tajungba aser meputep kecha mali ta südaktsünür . Ni ABAM Literature & Education Board nung asembenren 1997 to 2005 inyak. Idangji Rev.O.Alem Executive Secretary aser Rev.C.Walu Board Secretary ta aliba mapang 2004-2005 onoki Ao Dictionary ka adoktsü jembu. Kechiyong ano Ao oshi tsütsü tatsütepa liasü aser Ao Dictionary kata adoka mali asü. Onok membentem ajak mapa lemsa . Kechiyong Dictionary ka adoktsü mapa temela masü. Aser tanü ama ABAM takar masü. Anungji iba mapa inyaksü onok nem paper tejang ka ka ta magütsü. Onok pei pei Alphabet lemsar inyak. Saka onok ajakibo yamala meinyaktet asü nung nibo medemer dang tali lemsüka joko ariteperji amua mao inyak. Telok mapaji temer final check sua kakat adoktsü atema ita pungo ita sen Rs.9000/- aguja Late Kilensowa nem inyakdaksü. Saka ABAM sen maka anungji sen 45000 onokisa bushitsüsa aküm. Iba mapang yabo sen ajia aika liasü. Senji yamai bushitep.

1. Impur arogo Rs.9000/-
2. Mopungchukit arogo Rs.9000/-
3. P .Renthy Jamir Board member Rs. 9000/-
4. Mr .Lanu Imchen DIS Board member Rs.7000/-
5. Mr .Benjanamo Advocate board member Rs.5000/-
6. Mangmetong Arogotsür Rs.5000/-
7. Mr .Sentonglemba Ungma board member Rs.1000/-

Yamaji ABAM tenzükter ajaki pei lemsükba shilem nungji takok angutsü , onok Board member amaji TAKÜM MAPANG SEMPET , RONGSEN ajak agi ochishia tenzükra. IBA PUTU NUNGSA OZÜLI Y A MISSIONARY LIMA KA KÜMDAKJANG ta ayimtenba ya matalokiayang malitsü ta iba ocet tembanger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Lebanon nung missile ajanga Tenla kidang jenoka alir nisung 8 asü



Israel nung missile ajanga Lebanon kubok Tyre yimti nung aliba Melkite Greek Catholic Eparchy Tenla ki poksaja aliba noksa nung angur.

October 12, 2024: Israel nungertemi missile amshia amakba lendong nung Lebanon nung aliba Tenla ki ka poksatsüogo aser yangji jenoka alir nisung 8 süogo. Bodhbar aonung piyong amakba mapang nung Lebanon kubok Tyre yimti nung aliba Melkite Greek Catholic Eparchy Tenla ki poksatsüogo, ta Khristan melungtet telok, Aid to the Church in Need (ACN)-i metetdaksü. Tenla kidangji nisung aika jenoka liasü aser parnok

rongnung nisung 8 bo süogo. Missile ajanga Tenla ki denji Arogo indang hall ana den putir ki aser Arogo office aliba building ka poksaja, ta Arogo lenirtemi ACN nem metetdaksü. ACN nungi Amy Balog-i, "Osang ano tejangja memetet aser osang tejangja angutsü kanga tasak. Iba lendong ya Bodhbar aonung, October 9 aonung atalok asütsüa akok. Ajisüaka iba tatalokba yabo balaka, kechiyong onok indang Arogo partners-i ashiba agi,

Tenla ki ya 'metetsüomonga' amakba lir ta ashir. Tenük kuli alirtem den onoki tongtepratepa jembidar. Tang tashi nungbo onoki osang tejangja meshitetsü," ta metetdaksü. Khristan melungtet telok ACN yagi Lebanon nung project 200 shi nungita yaridar aser parnok tang tensa nung local Arogotem den yaritepdar. Tesüiba ita ishika tsünga ACN-i southern Lebanon nung nisung 1,200 nem chiyungtsü parcel den külemi nungdakba mozü balala lema agütsüogo.

UK National Week of Prayer nung shilem agitsü ayongzüker

October 12, 2024: UK aser British Isles nung Khristan organisations aser Arogotemi tamangertem dang October 12 anogo nungi tenzüka October 20 tashi National Week of Prayer nung shilem agia longjemer sarasademtsü ayongzüker. Khristan lenirtemi tamangertem dang Tsüngrem dang tatok meshitsü, tanela asentenshitsü aser linük nung temelenshi tulu adoktsü atema sarasademtsü ayongzüker. Open Doors UK & Ireland, 24-7 Prayer, CARE aser Evangelical Alliance longjemer ayongzükerba sentong ya Khristantem dang peipei tesem nung ayongzükerba sentongtem nung shilem agia adentsü aser shisaliok, yimtenren aser arts atema sarasademtsü nükjidong nung ayongzükerba lir. National Week of Prayer tongti sentongji October 16 nü Westminister nung Parliament House anasa aliba Emmanuel Centre nung agitsü. Tongti sentong nungji nisung

noklang aika adenshia Tsüngremi linük atema mapa tajung inyakba asoshi Pa nem tenüngsang agütsütsü aser tarutsü anogotem atema sarasademtsü. Project Coordinator, Kamesh Flynn-i, "Tesüiba ita ishika linük tesem ajaklen Arogo ka ama longjemer linük atema ajemalua sarasadema aruogo. Denomination balala nungi süaka nisung asem mesüra 3,000 adenshiaka iba mapang ya UK atema Tsüngrem dangi meyiptsü aser Pa dak anguba maitsü asentenshitsü asoshi maongka asütsü," ta metetdaksü. National Week of Prayer atema denomination balala nungi Arogotem longjemogo. Coptic Orthodox Archbishop of London nung Archbishop Angaelos-i, "Asenoki sarasademtsüba dak alaka tashi tuluba mali. Longjemer nokdakang aser longjemer sarasademang. Kodang asenok longjemdir yangji Tsüngrem alitsü. Sarasadema hopta nung

asenoki asen linük nung yimsü temeden mangurtem atema sarasademtsüdi," ta metetdaksü. Bishop of Winchester, Philip Mounstephen-i, "Asenok ya tashi agüja aliba nüburtem lir aser asenoki tanela nung anüng-ali yanglusang dang sarasademtsütsü aser temelenshi adoktsü ta amangtetsü. Asenoki sarasademdi," ta ayongzüker. Central London Catholic Churches nungi Dominic Robinson-i, "Khristan ka ama National Week of Prayer nung longjemtsü onoki ayongzüker. Asenoki Tsüngrem nungdaker ta bilemtetsü, Pa nungi anguba sempettem atema Tsüngrem nem tenüngsang agütsütsü, aser asen linük tanela asentenshitsü atema longjemer sarasademtsü," ta metetdaksü. National Week of Prayer ayongzükerterem rongnung Christians in Government, City Prayer Breakfast, Christians in Politics, aser Christian Embassy London densema lir.

Malaysia nung Mufti Bill ajanga Khristantem timtemsüa akok

October 12, 2024: Tawa Malaysia nung Mufti Bill benokba ajanga linük nung yimsü temeden jenjang tamajungba akümtsüa akok, ta International Christian Concern (ICC)-i metetdaksü. Meimchir temeden atema inyaker, Siti Kasim-i, Mufti bill ya agizükra iba ozüng ajanga yimsü dak sendakba court tem nem ano tashi tuluba agütsütsü aser Muslim nung masürtem

dang nungi temeden balala agienadoktsü, ta metetdaksü. Kasim-isa, iba bill ya linük nung Islamic ozüng tashi itshitsü nükjidong nung lir, ta ashi. Tatishitsü ka lemsatapa lai, khen mapang ka nungbo Lebanon nung Khristan nütsüng teimba liasü saka Islamic ozüng ajanga tangbo Khristan nütsüng ishika dang kümogo, ta ashi. "Mufti bill ya yimsü dak

sendakba ozüng dang masü. Iba ya tashi aser tazüokba dak sendakba ozüng lir. Iba ozüng ya agizükra ibaji ajanga onük aika nung yimsü dak sendakba sorkar ketdangsertemi tashi tulu amshitsüsa akümtsü," ta lai ashi. Mufti bill ya tang Parliament nung benoka lir aser iba bill ya agizükra linük nung Khristantem densema minorities-i pei yimsü sadema mamangtetsüsa tensa arutsü, ta aikati bilemer.

ANO GO ABEN TSÜNGREM DEN

TSÜNGREM MEBUSHIBA TESAMA

Temenenpur ki nung Kibuba atakatem lir; Saka temeshipur talidak Pai moatsür.

~ Apijemtsü 3:33

Alima nung Tsüngrem osang tajung mangashidangba nisung aika lir, Tsüngremi itempur metet, T.Mapa 17:30 nung memetetba mapangji Tsüngremi nungbo odang doktsü ta shia aliba angutsü. Saka asen alidak nungi tenzüker tenüng agibo Khristan saka pei sünütsü, pei inyaknütsü inyaka alirtem tanü aika lir. Pa dak amanger saka Tsüngremji shibar mejangja, sarasademtsü mejangrar tamang tanela chiyongtsü Tsüngrem O mezüngnüba, Pa külemtsü meblemtemba temenenji kechiar mejangjai pei sasa pei taküm mebushi-i tesama lenmang nung jajartem aika lir. Hau, Tsüngremji tatasa aliba Tsüngrem saka Pa taochi süitemerbo Pai sendoktsü.

Iba Lai O nung ashiba ama, Temeshipur talidak Pai moatsür. Asenoki ajangshia aruba nung Tsüngrem akümtsübuba taküm aser kibongtem chirnur/semchisemnurtem tashi azükarua temoatsü nung aliba aika lir. T.Ken 37:25 Dawid-i ashi, Tangbo ni tambur kümogo, saka kü lanuwa nungi temeshipur senzüka yutsüba ni mangu, mesüra pei chirtem meshimetsüba ni munguka.

Tanü bilemdanga shisadanga, Tsüngremer atakatem agi menüpa timtemba aser samaba kija taküm aser kibong alima otsü tatalokba nung süaka, lai o nunga angur. Item ajak ya teyanglur Tsüngrem mebushiba tesama ajanga ta kuli angur. Arung, Tsüngrem bushiteta Pa den nendakaजार asütsü merangdi.

Franklin Graham-i Samaritan's Purse volunteers atema sarademjang ta mepishi

October 12, 2024: Onoki tzü, chiyungtsü, mozü Brihostibarnü 'Milton' ta ajaba aser totzü bener oa yipru mopung tesashi agi timtemertem yarir," ta Florida kongshiba sülen metetdaksü. Khristan melungtet telok Franklin Graham-i, "Teyari Samaritan's Purse nungi agütsüba maparen inyakba volunteer temi teyari agütsüba ajanga onoki nüburtem dang, maparen inyakba mapang nung Tsüngremi nenok meimer aser Samaritan's Purse tongti aser anepalur, ta ashitsü atema sayutsüingir, Franklin Graham-i maongka angur," ta ashi. Khristantem dang Samaritan's Purse volunteers atema Hurricane Milton agi Florida sarasademjang, ta mepishi. kübok Tampa kongshiba lendong nung nisung 16 süogo.

Yipru lendong nung ki Franklin Graham-i raksaba sülen timtemertem, tzü Khristantem dang, "Volunteers agi anüngertem aser electricity atema sarasademjang. Onok mangurtem den Samaritan's mangurtem den Samaritan's volunteers aika lir. Tetsür- teburtemi pei nija mapa toktsür Purse-i yaritepa arudar. Samaritan's Purse nung pei rongsen aser nübo indoka CEO, Graham-i, "Onoki teyaritep mapa inyaker. Iba mapa helicopters amshia kanga ya mapa temela masü. Jana tezülen aliba tesemtemi oa indokba maparen nung parnokti timtemertem yaria arudar. yariteper," ta metetdaksü.

AO OSHI ANGAZÜKDAK:



Tanüasüng

(adj) tang mapangba ya (nowadays)

* Tanü asüng tanurtemsa tajungba aiener.

Tanubo

(adj) tebur rognung küm nung ishiba (younger male)

* Moaba kü dang nungi tanubo.

OLONG PAITEP # 6950

	1			2	3			
4			5					6
					7			
	8							
	9		10			11		
					12			13
14								
					15			

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6949 TELANGZÜBA

TIPIEN :

- 1. Kasa, 6. Rangben, 7. Mait,
- 9. Poktet, 11. Ati, 13. Atasa, 16. Rür,
- 17. Rajang, 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Sүjak, 3. Onük, 4. Oba,
- 5. Anü, 6. Ratet, 7. Mozü, 8. Ita,
- 10. Tar, 12. Tinu, 14. Salem,
- 15. Aja, 18. Anünü, 19. Taju, 21. Ano,
- 22. Onü, 23. Kua.

NAI-A YA METETTER MA



Alima nung oshi ana (bilingual) nung kaket zülur tanutsülaji arishi küm 4 tain Anvi Vishesh Agrawal lir. Lai English aser Spanish oshitem agi 'Little Girl's Big Emotions' ta ser kaket ka züluba ajanga Guinness World Records nung züngsemogo. Anvi-i iba kaket copy 1,000 ayokba ajanga Guinness World Records criteria atong aser iba jagi la nem kulikaket agütsü.

Rajnath Singh-i mapatong 75 sayatsü

Guwahati, October 12, 2024 (Agencies): Union Defence Minister Rajnath Singh-i Honibarnü Sikkim kübok Sherathang semdangtsüba liasü saka tsüngsang majungba ajanga Sukna nungi infrastructure projects 75 sayatsüogo.

Sherathang ya Nathula border anasa lir aser tanü agi anogo ananübuba Bagdogra airport nungi iba tesemi moutet. Hokolbar nungi pa Siliguri nung Sukna Military base nung anenzüka lir.

Indo-Tibet arrtsü anasa national security aser border connectivity ajungketsü atema Rajnath-i infrastructure projects 75 sayatsü.

Külen, Sikkim Chief Minister Prem Singh Tamang den Lok Sabha MP Indra Hang Subba aser cabinet minister tem Sherathang-i ao.

Union Defence Minister-i online ajanga sayatsüba sentong nung Rajasthan, Himachal Pradesh, Nagaland, aser Mizoram Governor tem aden.

Item mapatong ya Border Roads Organisation (BRO) ajanga keddangtsüa inyak aser state o Union Territory balala nung apu 51, lenmang 22 aser tanga mapa 2 dena lir.

Mizoram nung metre 125 talang Nengpuihui Bridge, Arunachal Pradesh nung kilometre 2.595 Sela Tunnel aser Arunachal nungsa Kaying Helipad mapatongtem lapoktsüogo.

"BRO-i 2023 küm mapatong 125 renemba atema tenüngsang agütsü. India sorkari border infrastructure renloktsü tenangzükba ama mapa inyaka arur" ta Rajnath Singh-i ashi.

SOREPA-i Oct 15 nü mokdangtsü ayonger

Imphal, October 12, 2024 (Agencies): Socialist Revolutionary Party (SOREPA), Kangleipak-i October 15 nü ghonda 12 mokdangtsü ayongzükogo.

1949 nung tashiyim agi Indian Union nung Manipur dendaktsüba anema parnoki iba sentong ayonger.

"Manipur ya chuba yimli ka liasü saka 1949 küm Shillong (Meghalaya) nung Manipur chuba Maharaja Bodhachandra nem tashiyim agi India nung state ka akümtsü tenangzükba nung sign sädaktsü" ta SOREPA publicity secretary MC Yaiphabi-i ashi.

Iba mokdang nung emergency services madentsü ta pai ashi. Western South East Asia (WESEA) nung tanga teloktemi ayongba mokdang nunga SOREPA-i pusema nungitsü ta MC Yaiphabi-isa ashi.

India-i Armed Forces (Special Power) Act (AFSPA) amshia northeast nung alenbanger aser ajembanga ayur ta SOREPA-i metetdaktü.

India-i teyari agüja Chin-Kuki telungpurtemi Manipur nung ozüing alema mapa inyaker ta SOREPA-isa ashi.

Manipur nung ozüingi noktanga aliba telungpur telok 6-i tentetba Coordination Committee (CorCom)-ia October 15 anepdang 6:00 ako nungi ghonda 12 mokdangtsü ayongzükogo.



OFFICE OF THE DIMAPUR YIMJENKIMONGTSÜR TELONGJEM

Dimapur : Nagaland, Pin : 797112

"Telongjem nung Tejakleni"

TENÜNGSANG AGÜTSÜR

Wb. Dr. Yapangchang Ao S/o. Late Punamerang, pai School Education Department Government of Nagaland nung Assistant Director/SDEO/ADEO temaba jenjang ngutetba asoshi Dimapur Yimjenkimongtsür Telongjem (DYT) ajanga konang tetushi tulu agütsür.

Ano maneni anema aliba Tsüngremer temoatsü nung ner kibong aser ne wadang moajangma.



Sd/-
Wt. T. Atsunгла Lemtur
President D.Y.T

Sd/-
Wt. Bendangienla
General Secretary D.Y.T

DIMAPUR MOLUNGYIMSEN KAKETSHIR TELONGJEM

Lucky Draw Results

1st Prize – 4667

2nd Prize – 4533

3rd Prize – 2407

CONSOLATION

3457, 1183, 4834, 2784, 4013

Sd/-
Temshijong Sanglir
President

Sd/-
Temsuenla Ao
General Secretary



OFFICE OF THE DIMAPUR MONGSENYIMTI SENSO TELONGJEM
DIMAPUR : NAGALAND.

KUKUA AITSÜR

10TH October, 2024 anogo nung tai maketba ozü Mongsenyimti Senso züngsem tajung ana Living Water Factory mapa inyaka lia NSCN (K) Niki teloki pua bener (kidnapped) aobaji ozü Dimapur Mongsenyimti Senso Telongjemi kukua aitsür.

Iba ken o nung DAYO-i anir DNYO, AYFD aser FAYO koba police keddangser den anogo mapang atakzüktsür inyakdar, Dimapur Mongsenyimti Senso Telongjemi kanga pelaba den ozü senso telongjemi tatem tashi nungita yaritsü.

Sd/
(T. ALI OZÜKÜM)
Prtesident, DMST.

(NÜKSUNG)
General Secretary, DMST.



OFFICE OF THE AO SENSO TELONGJEM DIMAPUR

Dimapur - 797112 : Nagaland

"Telongjem aser Terenlok"

AO SENSO TELONGJEM DIMAPUR (ASTD)-i KHU-KHUA AITSÜR

October 10th 2024 Diphupar nung Ao-er lanur tajung ana, shirnok Ao Youth Forum Diphupar (AYFD) aser Foothill Ao Youth Organisation (FAYO) züngsem tajung lir, linük tenzüker tenüng amer-i tena pur aoba aser tamakangtsü akangba atema Ao Senso Telongjem Dimapur (ASTD)-i khu-khua aitsür ta sangdonger. Alima sünepa aoba tensa ka nung nisungtem tsübudaktsüa lanur shishilembar amokmerena mapa tamajung inyakba ya kanga süngmanger. ASTD-i iba mapa tamajung inyakba ya maremteter aser aitsür. Yamala yimya ya tang-a aser tarutsü nung-a memelatsü. Anungji ozüing bangdakpur-i tekarakba nung aibelenertem aputsü aser tapet temerenshi agütsütsü ASTD-i akanger aser tai maketer temeden mangu tashi ozü ASTD-i bushitsü aser nokdaktsü ta metetdaktü.

Sd/-
Ningsangwaba Pongen,
President, ASTD

Sd/-
K. Tsukti Longchar
Secretary, ASTD.

Israel-i Gaza nung Jabalia refugee camp amak; nisung 22 tepset



Northern Gaza kubok Jabalia nung aliba Palestine nungertem Gaza yimti kubok tanga tesemi jena aoba noksa nung angur. Israel-i Jabalia amakba sülen nisung aika tepsetba den aika yirutsüogo.

Tel Aviv, Mongputeni/October 12 (Agencies): Israel-i northern Gaza nung Jabalia refugee camp amakba sülen tetsür aser tanur densema nisung 22 tepsetogo.

Honibarnü asürtem timba küma aoba mapang ka nung Israel military-i northern Gaza toktsür aotsü atema iba tesem nung alirtem nem tetuyuba tasen agüja, Jabalia anasa alirtem dang iba tesem south leni aotsü tetuyuba agütsüogo.

Israel military-i hopta ka tejakdang Jabalia temeket kanga sashia makogo. Hamas pur asüngsashiba nokdangtsü atema Israel military-i iba tesem ya maka liasü ta metetaktsüogo. Iba tesem amakba sülen Palestine nungeri aika iba tesem nung sabanga liasü, ta international charity Doctors Without Borders shirnok dang MSF ta ajar parnoki ashi.

Hamas-i Honibarnü Israel army aitsüogo aser ashiba agi, America-i teyari agüja Israel nungeri maneni par nisungtem samatsütsü meranger.

Iba tesem amakba sülen nisung 90 dak tema yiruogo. Iba tesem nung aliba Palestine nungertemi parnok meinshiba magizükba aser Israel anema nokdangba atema temerenshi ama iba tesem makogo, ta Hamas-isa ashi.

Palestine indang news agency Wafa-i Honibrnü sangdong ka ajanga ashiba agi, Israel nungeri indang fighter jets temi Hokolbar aonung Jabalia nung multistorey apartment block ka amak aser iba mapang nisung aliba ki pezü dak kongshia nisung 22 tepseta liasü.

Iba lendong nung nisung 30 yiru aser nisung 14 tang tashi samar bushidar aser parnok ya ki teraksa nung sabanger alitsü ta amanger, ta Wafa sangdong ajangsa metetaktsü.

Central Gaza nung Deir el-Balah nungi Al Jazeera osangbener Hani Mahmoud-i ashiba agi, iba tesem nung

bomb tulu apokba Gaza Strip north len nungia angashia liasü. Yirur aser asürtem timba azü agi yangbanger mozükidangi anir arudar, ta Mahmoud-isa ashi.

North nung Kamal Adwan Hospital ya taoba mapang totzü maliba ajanga shibangtsü dang liasü aser staff temi ashiba agi, Israel nungeri sepaitemi mozüki toktsür aotsü atema parnok nem tetuyuba agüja liasü.

Al Jazeera osangbener Moath al-Kahlout-i iba facility nungi ashiba agi, hopta ka tepeyong iba tesem sabang ayuba ajanga inyaksangshi mesüteti kümogo.

Tensa mejungi lir, ta pai ashiba den Israel military-i iba mozüki ojang dang inyaksangshitsü tetuyuba agütsüogo. Ajisüaka pai ashiba agi, iba mozüki nung yirur alirtem nem maneni teyari agütsüdar.

World Food Programme (WFP)-i Honibarnü, northern Gaza nung tensa tamajungba küma aoba ajanga Palestine nungeri kibong meyirejang aika chiyongtsü agi anünga akümtsü ana nung lir ta tekümdangtsü metetaktsüogo.

October 1 nü nungi tang tashi nung chiyongtsü teyari kecha iba tesem tonga mao, ta United Nations agency yagi ashiba den, north-i aoba lenmang tongtiba shibangogo, ta shisem.

Chiyongtsü alemba tesem, kitchen aser bakery tem Israel nungertemi anüng aser ali ajanga amakba aser iba tesem azüngtettsütsü atema tetuyuba agütsüba ajanga shibangtsüsa kümogo, ta kasa sangdong ajanga metetaktsü.

WFP-i ashiba agi, canned food, wheat flour, high-energy biscuits, aser nutrition supplements tem densema north nung aliba tatembangbuba supply tem, Gaza yimti nung tejenokdak balala, health facilities aser kitchen tem nem lema

agütsüogo.

Kasa mapang nung Gaza yimti nunga Tuffah tesem nung ki ka amakba sülen nisung asem tepsetogo aser nisung ishika yiruogo, ta Palestine Red Crescent Society paramedics-i metetaktsü.

Israeli military-i Honibarnü social media platform X nung northern Gaza indang map ka lemsatepogo aser Jabalia nung alirtem dang iba tesem toktsür aotsü atema tetuyuba agüja liasü.

"Iba tesem ya Salah al-Din Street ajanga humanitarian area temi tangsa tang azüngtettsütsüla," ta iba post nung shia lir. Humanitarian area ta asüba ya al-Mawasi aser Deir el-Balah na tsünga Israel-i mekazükja aliba humanitarian safe zones dang ajarba lir.

Iba "humanitarian area" nung nütsünyongsük tali kümogo aser Palestine nungeri million ka shi jenoker lir aser Israel military-i iba tesem aiben maka arudar.

Ajisüaka iba tesem north len aliba Palestine nungeri temi parnok ki toktsür aotsü memulunger, ta Al Jazeera osangbener Hind Khoudary-i ashi.

Iba tesem azüngtettsütsü atema tetuyuba agütsür aliba mapang MSF project coordinator Sarah Vuylsteke-i X ajanga ashiba agi, nisung shinga iba tesemi aitsü aser tugutsü memelar aser karidanga merangdangra parnok dak injang khaloktsür.

MSF staff pongu Jabalia nung sabanger lir, ta lai ashi.

Gaza indang Ministry of Health-i Honibarnü ashiba agi, 2023 küm October ita nungi tang tashi nung Israel nungeri sepaitemi nisung 42,175 tepsetogo aser nisung 98,336 yirutsüogo.

Asürtem rongnung taoba ghonda 24 tsünga nisung 49 asüba aser nisung 219 yiruba densema lir, ta ministry-i ashi.

Molungnen O



ASO: 05/12/1972

ASÜ: 06/10/2024

LT. MR. IMLIAKÜM JAMIR

Onok asür Imliaküm'er kinungertemi onok mangyimjashi tia nung aliba mapang Arogo, lokti tentet, kija aser shirnokisa onok den asükhu lemsatepogo nenok ajak dang kanga pelaba lemsateper. Nenoki onok nongita yariba den o tanep lemsatepba aser tsüngtong arua asükhu lemsatepba ajanga mangyim jashi tia nung aliba mapang onok nem anisüngzük agütsüogo.

Nenok ajaki lenla balala ajanga onok dang temeim sayuba atema kangasa pelar. Asükhu mapang nenoki onok atema aria bilemtsüba aser sarasadem nung nongita yariba ajanga iba tia ajangtettsü atema ozü kibong nem tashi agütsüogo.

- Temeim Kinungtsü, Jabaso aser Kinungertem.

MOLUNGNEN O



IMOLANGLA
TASOBA: RONGJUI 1918
TASÜBA: 06.10.2024

Onoki teti meimla Ojala Imolangla (Chuchuyimlang) iba lima nungi la küm 106 jangratema lir 6th Mongputeni 2024 anogo iba akümüli toktsür ao.

Iba mangyim asüko nung shirisa ozü den temeim lemsatepoko, ajak dang kangasa pelaba metetaktsür.

Ozüi kecha makutsütetaka tajung sang Tsüngremi nenok ajak moajang, aji ozü sarasadem.

-Temeim Chirnur aser Kinungertem

US-i Iran indang oil sector nem tenokdangba agütsü

Washington, Mongputeni/October 12 (Agencies): Iran-i tawa Israel nung military amendaker aliba tesem balala missile amshia amakba atema merenshitsu asoshi United States-i Iran totzü belenshiba aser shishilembaba company aser rongtem nem tenokdangba agütsüogo.

US Treasury aser State Department-i iba tenokdangba agütsüba ya Hokolbarnü metetaktsüogo. Iran-i tesem balala amakba atema telangzüba tesashi agütsütsü nangzükker aliba mapang ka nung tang US-i iba jenjang agiogo.

Tehran-i October 1 nü Israel dak missile aika khaloktsüogo. Hamas tekolakba Ismail Haniyeh Tehran nung tepsetba aser Hezbollah lenir Hassan Nasrallah aser Iran nungeri general ka Beirut nung tepsetba atema Iran-i Israel maka liasü.

"Iran-i October 1 nü Israel amakba sülen parnok nem tenokdangba agütsütsü atema United States-i jangja jangja metetaktsüogo," ta Secretary of State Antony Blinken-i ashi.

"Iba dak sendakba nung onoki Iran nung yimsüsürtem dangi revenue aoba minprongtsü atema tanü iba jenjang agir, kechiyong iba sen ya parnoki nuclear program aser missile

yanglutsü aser terrorist proxies aser partner tem nongita yaritsü aser Middle East nung mangatettep adokdaksütsü atema amshir," ta paisa shisem.

Hokolbarnü tenokdangba agütsüba nung Iran indang oil and petrochemical industry tem densema lir, koba Washington-i ashiba agi, Tehran-i ballistic missile aser nuclear programme tem atema amshir.

Ajisüaka Iran indang oil aser petrochemicals industry tem ya US-i iba masüdanga tenokdangba tesashi agütsür lir.

State Department-i, Hokolbarnü company trok aser rong trok nem tenokdangba agütsüogo aser Treasury-i rong 17 nem tenokdangba agüja liasü.

Rongtem ya United Arab Emirates, China aser Panama nungeri densema tanga tesemtem nung züngoksema lir.

Iba tenokdangba agütsüba ajanga item company tem indang assets tem US nung tamshi majung akümtsü aser item company den inyaksangshitsu asoshi America nungeri asoshi ozüing alema kumatoktsü.

Iran-i Israel amakba sülen Israel-i telangzüba tesashi agüja iba tesem nung rara tesashiba küma aotsü akok ta aikati tsüba bilemer.

N.I Jamir Basketball tournament asayamung kaogo



N.I Jamir Basketball tournament tetsür champion - Team Intermingle aser tebur champion - Kohima Highlanders noksa nung angur.



Mokokchung, 12th Oct (TYO): 6 buba N.I Jamir Memorial Nagaland Open Basketball Tournament Oct 8 nungi Oct 10 tashi Imkongmeren Sports Complex Basketball Court, Mokokchung nung asaya-a mungogo. Iba tournament ya Basketball

Association Mokokchung District aser Nagaland Basketball Association aküm nung Intermingle Club, Mokokchung-i ayongzük. Tetsür final match nung Intermingle Club aser All Blacks na asayaba Intermingle-i 48-37 agi All Blacks madak

takok tulu ngua parnoki champion aben. Teburtem final Kohima Highlanders aser The Mystic Ballers (TMB) na asayaba, Highlanders-i 92-88 agi TMB madak takok tulu ngua parnoki champion aben. Nija senpet agizükertemji; tetsür category nung Most

Valuable Player (MVP) ji Team Intermingle nungi Sentiya-la-i angu aser tebur category nung Kohima Highlanders nungi Keneitseizo Belho-i agizük. Tenaprong nem kulikaket den senpet sen 10,000/- (ten thousand each) agütsü. Iba den tetsür aser tebur

category anaprongla nung mezüng jenjang angur nem senpet sen lakh kaka (one lakh each) aser tanabuba jenjang nem 50,000/- (fifty thousand each) agütsü. Iba tournament shibangba sentong nung I. Imliyanger Jamir tetushi tesemdanger liasü.

Taoba Liverpool, Schalke defender Joel Matip asaya nungi anener

Mongputeni/October 12, 2024 (Agencies): Liverpool-i official sangdong ka ajanga taoba mapang club defender Joel Matip arishi küm 33buba nung football asaya nungi anisüngzükba sangdongogo. Matip Liverpool nungi küm 8 asayaba sülen taküm club toktsü aser pa club ka nungi danga masayai liasü. Anfield nung season ti asayaba mapang Matip-i asaya 201 nung asayaogo aser Champions League densema asayamung tongtibang trok tashi kokogo. Pa club nungi tatembangbuba season nung ACL yiruba ajanga asayar 14 nung dang asayatetaka pa Anfield nung

tatembangbuba asaya nung shilem agia fan temi pa kanga menungra minoktsüogo. Matip indang professional career ya Schalke nung tenzük. Pa mezüngbuba 2009 küm asaya tenzükba liasü. Germany nung pa sempet arantetshiba sülen pa 2016 küm free transfer nung Liverpool-i ao aser Jürgen Klopp lenisüba nung team nung asayar tongtibang ka kuma liasü. Liverpool toktsüba sülen pa West Ham-i aotsü akok ta osang adoka liasü, saka tang Matip-i pa asaya nungi anentsü atema telemtetba agiba sangdongogo. Pa küm 15 tashi asayaba sülen tang asaya nungi anisüngzükba. German nung asoba

Cameron nung center-back ya pa indang career nung asaya 500 nung asayaogo kong first-team level nung asaya 450 dak tema nung asayaba densema lir. International football nung Matip Cameroon team nungi 27 ben asayaogo. Pa Cameroon team nungi 2010 aser 2014 küm World Cup nung asayaogo. "Ni football asaya den küm aika sendakteper arudar aser iba mapang Joel Matip ama ajaki meimba asayar aikabo ni mangu," ta taoba mapang Liverpool coach Klopp-i ashi. Matip-i ground telung aser tema nung teyari agütsüba ajanga club kanga ajanzükogo aser pa ya ajaki kanga saklokba nisung ka kümogo.

5buba Padmashree W. Nokdenlemba Open volleyball asayamung osang



Champion team G-Sports den tayongertem külemi tangokba noksa nung angur.

New Zealand den Test asaya atema India team sangdongogo

Mongputeni/October 12, 2024 (Agencies): New Zealand den Monglbarnü nungi tenzükba Bengaluru nung Test asaya asem asayatsü aliba asoshi Jasprit Bumrah vice-captain asütsü shimogo. Bumrah vice-captain asütsü shimba tetezü tarutsü nung Rohit Sharma asaya kar nung masayatetsüsa kümra India team pa lenisüba nung asayatsü. Senior selection committee-i Bumrah nem iba mapa agütsüogo. Bumrah lenisüba nung 2022 küm July ita India team England den Birmingham nung Test asaya kabo

asayatokogo. Kasa mapang nung India team November ita Australia den Test asaya pongu asayatsü atema aotsü lir, aser Rohit-i iba asayamung nung asayar kar nung danga masayatsü atema telemtetba agira Bumrah lenisüba nung team asayatsü. Bangladesh den kidang Test asaya ana asayaba mapangbo selection committee vice-captain meshim, ajisüaka tang Bumrah shimba tetezü, pa iba shilem atema renema lidaktsütsü asoshi lir ta angateter. Pacers Harshit Rana aser Mayank Yadav, aser all-rounder

Nitish Kumar Reddy nung team nung züngoksema lir. Ajisüaka pacer Mohammed Shami bo team nung züngoksema mali. Bangladesh den asayatsü asoshi shimba team nungi NZ den asayatsü asoshi shimba team nung left-arm pacer Yash Dayal dang mali. NZ den tanabuba aser tasembuba asaya Pune aser Mumbai na nung asayatsü. India aser Bangladesh na tawa asayaba asayamung India-i 2-0 agi kokogo. Kasa mapang nung New Zealand pur tesüsabuba Test asaya nung Sri Lanka-i 0-2 agi kokogo.

Mokokchung, Oct 12 (TYO): Ao Kaketshir Mungdang (AKM)-i ayongzükba 5 buba Padmashree W. Nokdenlemba Open Volleyball Tournament Oct 9th nungi tenzükba anogo asemnü Multi Sports Complex, Mokokchung nung asayaa mungogo. Taküm iba asayamung marok G-Sports Mokokchung-i benogo. Tanü tesüsabuba asaya G-Sports Mokokchung aser United Changki na asayang, mezüng set G-Sports-i 25/19 agi akok, tanabuba aser tasembuba set ji United Changki-i 26/24, 28/26 agi akok, pezübuba aser pungububa set ji G-Sports-i 25/22 aser 15/8 agi United Changki madak takok tulu ngua liasü. Semi-final nung G-Sports Mokokchung-i Changtongya Volleyball Association (CVA) pur 25/14, 25/20 aser 25/22

straight sets nung akok aser United Changki-i Michazou Kohima pur 25/22, 21/25, 25/23 aser 25/16 agi koka final asayatsü jenjang tongtet. Champion team nem senpet sen 100000/- (one lakh), tanabuba nem 50,000/- (fifty thousand) aser semifinal nung tsüker team anaprong nem sen 20,000/- (twenty thousand each) agütsüogo. Nija senpet – Best Setter: Tongpangsunep (G-Sports), Best Spiker: Reshitemjen (G-Sports), Best Libero: Chubamanen (G-Sports), Player of the tournament: Vimechozo Thuphre (Michazou), Emerging player of the tournament: Imtirenba (United Changki)-i agizük. Parnok ajak nem senpet sen 10,000/- den kulikaket senpetsü. Asayamung shibangba sentong nung Advisor & MLA, Imkong L Imchen tetushi tesemdanger arua meraketsü.

MDFA Trophy 2024 Oct 15 nungi asayatsü

Mokokchung, 12th Oct (TYO): Ajaki yongya ataba Mokokchung District Football Association (MDFA) Trophy tan October 15th nungi tenzükba "fueling passion, inspiring dreams" omen dak rangloker Imkongmeren Sports Complex, Mokokchung nung asayatsüba lir aser iba asoshi 11th Oct nü MDFA Treasurer kidang pool draw süogo. Taküm asayatsüpur telok 12 lir aser Pool 4 kuma lemsar

asayatsü. Pool 'A' nung – DEF, Team Gilgal aser MMSC, Pool 'B' nung - Super Senior SC, SSS aser Zonipang, Pool 'C' nung – Eastern Wing, LYM aser N.U Lumami aser, Pool 'D' nung – Amokmolu SC, Telongjem FC aser KSUM ta alitsü. Taküm iba asayamung State Election Commissioner, Nagaland, Kohima aser IPS retired, T. John Longkumer, tongti tesemdanger asütsü jaoka lir. Asayamung lapokba sentong

15th Oct nü anüngdang 1:00 ako nungi tenzüktsü. Osang tajung kaji iniüji nüngtugu band balala nungi senteper akümba 'MW Assemble Band' ta süer telok kadi shilem agitsü renema lir. Iba asayamung shibai bendir champion team nem senpet sen lakh 2, runner-up nem 1 lakh aser semifinal nung tsüker ana nema sen 25,000/- each agütsütsü. Iba den ano nija senpet kar shima kulikaket den sen senpetsütsü ta tayongertemi metetdaksüogo.

BILEMDANGANG
"Tia tensa ajak nung Tsüngrem tamatok."